



Tir Yimyim

www.tirymyim.in

Regd. No. RNI. NAGAAO/2004/13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma : Tir Yimyim

tirymyim@aolima

tir yimyim

TAPAK 8



Bihar Caste Census sayaogo; OBCs aser EBCs nütsüng shilem 63 lir

Ronaldinho-i October ita tom nung Kolkata semdangtsü



VOL. XX NO. 352 (ADOK 352) DIMAPUR SANGTENNÜ (TUESDAY)

MONGPUTENI (OCTOBER) 03, 2023 ₹ 5.00

Opposition temi caste nung ajem-daker telemsa adokdaksür: PM Modi

Gwalior, Mongputeni/Oct. 02 (Agencies): Tenüing mejateti Congress aitsüandang, opposition party temi küm 60 tashi makamaiter molungsentsü den asaya aser caste line nung ajemdaker linük nung telemsa adokdaksü aser iba temenen ya tanga inyaker, ta Ato Kilonser Narendra Modi-i Hombarnü ashi.

2024 Lok Sabha election agitsü ita ishika lia Bihar nung Nitish Kumar sorkari caste survey nung bushitetba sangdonger ghonda ishika lir Modi-i iba o ya ashi, kong state nütsüng yongsük shilem 63 tashi OBCs aser EBCs lir ta bushitet.

Bihar nung tang yimsü tesüdak sorkar nung Congress dena lir aser Centre nung parnoki sorkar kumtetra caste nung ajemdaker census agitsü nangzüka lir.

Election agitsü aliba Madhya Pradesh indang Shajapur district nung anogo ana tejakdang rally ka nung jembidang, Centre nung Congress arura nübur ajunga, talisa Other Backward Classes (OBCs) ajangzüksü asoshi caste nung ajemdaker census agitsü, ta Congress lenir Rahul Gandhi-i shia liasü.

"Terenlok indang tsükchir-i Centre nung küm 60 yimsü süogo. Parnoki mapa tajung meinyaktet. Saka Centre nung BJP arur küm toku nung terenlok balala aruogo... Aser alimai India tenüing sanga ken atener. Küm toku nung mapa aika inyaktetra, kechiba küm paika nung kecha meinyaktet?" ta Modi-i Congress tenüing metetshie asüngdang.

Election agitsü aliba Madhya

Kuki MLA 10 anentsütsü asadanga mapang lir: Manipur CM

Imphal, Mongputeni/Oct. 02 (TYO): Administration temeja akhangba hill district tem nungi Kuki nung MLA ter anentsütsü asoshi yimteren tsütsü tematiba jenjang nung asadanga mapang lir, ta Manipur Chief Minister N Biren Singh-i Hombarnü ashi.

Imphal nung sentong ka agitsü lia BJP-i aniba sorkar nung BJP lenir Biren Singh-i osangbener dang iba sangdong ya agitsü.

Iba ken o atema Ato Kilonser aser Union Home Minister densema central BJP lenirtem den tanen makai osang agiteper aser ken o kanga yakyaka asadanger, ta pai ashi.

Kuki nung MLA ter nungya ruling BJP nungia densema lir aser parnoki administration temeja balaka meshia liasü,



Ato Kilonser Narendra Modi

Pradesh kübok Gwalior nung sen crore 19,000 dak tema indang terenlok maparen aser sentong balala tenzüksüba sülen jembidang Modi-i iba o ya shia liasü.

Modi-i ita tenet nung tan agi Madhya Pradesh tiben buba semdang alitsü. "Parnoki makamaiter molungjang den asaya aser caste lines nung lokti telemsa adokdaksü. Parnoki iba temenen mapa tanga inyaker," ta Modi-i opposition aitsü.

Alima sapang nung linük tenüing asangba BJP anemer temi maginer, ta pai ashi.

"Alima ajungai linük tenüing sanga aser India tarutsü tia angudang, politics nung nisung kari pei menden dak alaka kecha mangur... Alima ajunga nung India tenüing asangba parnoki maginer. Item terenlok anemba nisungtem yagi linük nung kecha matalok ta sayutsü meranger," ta PM Modi-i ashi.

"Parnoki kibong ka dang külemer. Taoba mapang parnok kechi inyaker, kasaji tanüa inyaker," ta pai ashi.

State nung 'miya' GB malitsüla: Rising People's Party

Dimapur, Mongputeni/Oct. 02 (TYO): Lisapur masü aser jakzüka mejangja GB ka ama shimba ya kangasa tim masü. New Market, Dimapur indang GB ama Abdul Kayum Talukdar shiba ya state sorkari tekeraba nung agientsüla, tang shiba Naga nung ali patta bena alirtem Assam nung amokmerenba ken o nung dena lir ta tai tonglokja lir, ta Rising People's Party sangdong ka ajanga ashi.

Pa GB ama shimba ya ozüing alema aser Naga nung ajunga asoshi mezüingmeshi lir, ta sangdong ajanga ashi.

"State nung 'miya' GB malitsüla," ta RPP sangdong ajanga ashi.

State telungi ozüing alema IBIs tem aita ya 'time bomb' ama Naga nung ayak asoshi tebilemstü tulu aliba mapang Talukdar nem GB menden agütsüba ya Naga nung ayak asoshi timtem lir.

State sorkari pa shimba meyipa magi tashi sorkari yaria illegal

immigration tem state telungi aitdaksür, ta shitetsü. GB ka asünung Residential Proof Certificates (RPC) agütsütsü Talukdar nem tashi agüja lir, anungji temolung melemettsüsa aliba nübur kwi nem pai RPCs agütsür alitsü, ajibo nisung ajaki meteta lir, ta RPP sangdong ajanga ashi.

Talukdar nem GBship agütsüba sülen pai RPCs agütsüba ajunga reprangshitsü Dimapur indang district administration dang ajungshir aser pai agüja aliba RPCs ajunga tazüing kuma sangdongtsü aser ano birth certificate, driving licenses aser trade licenses iba amala nisungtem nem agüja aliba ajunga agientsü ajungshir, ta ashi.

Talukdar shimsü shiba mesüra koba tashi ajanga totuyuba agütsü ta nisung ajak molungjang nung tasüngdangba arur. Commissioner, Nagaland ajanga iba atema Naga nung nem telangzüba agütsütsüla.

Kasa mapang Naga nung sobaliba madak kibur, GB association temi union züingsem nungi Talukdar agientsüla aser state sorkar danga pa shimba agientsü shitetsüla, ta Rising People's Party ajanga ashi.

Karbi Anglong nung aliba nüburtemia Naga nung aser Karbi nung asoshi arok tsükchir ka lir ta angatetsüla. Assam sorkari Nagaland arütsüleni IBIs tem nungzüka yoka yangji lidaksütsü ajungshiba ya Naga nung atema kisting masü saka Karbi Anglong lisapur atema timtem lir.

Memonudang KAAC aser Nagaland sorkar lungiemer iba tebilemstü koktettsü ajungshir, ta RPP ajanga ashi.

Iba ken o nung atsü-anem makateptsüla. RPP ya Nagaland wazüka ayutsü tejangraba nung tentetba regional party ka lir, aser GB menden nungi Talukdar magien tashi nokdaksü, ta Rising People's Party sangdong ajanga ashi.

Terenlok asoshi mürekmeju ya tongtipang lir: Minister Jacob Zhimomi



Dimapur, Mongputeni/Oct. 02 (TYO): Swachhata Hi Seva 2023 nungtem nung Swachh Bharat Mission (Grameen) kübok Best Performing Villages aser Jal Jeevan Mission (JJM) kübok Best Performing Districts nem tetushi agütsüba state level sentong ka "Garbage free India" omen nung ajemdaker Iwu-Shi Garden, Dimapur nung Hombarnü agia liasü.

Iba sentong nung jembidang Minister, PHED & Cooperation, Jacob Zhimomi-i ashiba agi, linük nung nüburtem nem mapa tajung inyaksü angatetdaksütsü atema tanübo Swachh Bharat Mission ya national movement ka kumogo.

Terenlok aliba lokti ka ama asenoki jana adokdaksüba indoktsü asen tebilemstü asütsüla. Sorkari state ajunga aser nüburtem dang jana-reja maliba linük ka akumtsü asoshi inyaksü ayongzüka lir, ta pai ashi.

Anungji iba movement ano temaba jenjangi ajungkettsü mechi linük nung aliba jila aser yimtsüng ajak nung meranga inyaker, ta pai ashi.

Pei müketa aliba müreka ayutsü aser mürekmeju yimya amshitsü ya meimchir terenlok asoshi tongti shilem ka lir. Item ya medeni terenlok malitsü, kechiaser ki o jen mesüra facility tajung aliba ya dang terenlok masü saka terenlok aliba lokti ka asoshi mürekmeju

yimya tajung ya tongtipang lir, ta pai ashi.

Iba sentong nung Minister Jacob Zhimomi-i Swachh Bharat Mission (Grameen) kübok Best Performing Villages aser Jal Jeevan Mission (JJM) kübok Best Performing Districts sempet agüja liasü.

District	Block Name	Village name
Dimapur	Chumoukedima	Kuda village
Chumoukedima	Dhansiripar	Kiyeto village
Niuland	Niuland	Ghokito village
Kiphire	Longmatra	Tethuyu village
Tseminyu	Chunlikha	Tesophenyu new village
Kohima	Kohima	Kohima village
Longleng	Longleng	Yachem village
Mokokchung	Chuchuyimlang	Yaongyimti new village
Mon	Tizit	Longting villa
Phek	Chetheba	Khulazu Bawe village
Tuensang	Longkhim	Chungtor village
Noklak	Noklak	Dan village
Shamator	Shamtor	Wapher village
Wokha	Ralan	Yanpha village
Zunheboto	Tokiye	Shevishe village
Peren	Tening	Nsong village

Category	Division/District
Percentage Har Ghar Jal villages reported as on September 2023	Wokha
Percentage Har Ghar Jal villages certified as on September 2023	Tuensang
Percentage of FHTC (Functional Household Tap Connection) coverage for 2023-24	Kohima rural (Tseminyu district)
Total of FHTC (Functional Household Tap Connection) coverage for 2023-24	Mon
Handing over of Har Ghar Jal certified schemes to the village WATSAN Committees as on September 2023-24	Dimapur rural (Niuland district)
Handing over of Har Ghar Jal certified schemes to the village WATSAN Committees as on September 2023-24	Wokha
Percentage FTK and Lab Water Testing Reported	Mokokchung
Women Trained for FTK Testing	Mon

Dimapur nung Ao lanurtemi azü tenla agütsür



Dimapur district hospital nung aliba Blood Bank nung nungdakba nisungtem asoshi yutsütsü atema Dimapur Ao Lanur Telongjem purtem den DABA nung Associate pastor, Rev.Dr.Lima Jamir dena azü tenla agütsüba noksa nung angur. Tang ya talisa Dengue tashidak agi shirangertem atema azü kanga rongdak nungdaka bushiteper. (Dimapur, October 02,2023) .

Dimapur, Oct.02 : Dimapur nung dengue tashidak agi shirangertem mozü kitem ajak nung azü kanga rongdak nungdakba mapang ka nung, Dimapur Ao Lanur Telongjem purtemi Dimapur District Hospital nung aliba Blood Bank nung ketdangser Dr.Temsü Lemtur den yaritepa azü tenla agütsüba sentong ka tanep tentonü anepdang nungi tenzükogo.

Iba sentong tenzükoga DABA

ning Associate pastor Toshi Longkumeri sarasadem aser Dr.Temsü Lemturi nungdakba purtem asoshi azü tenla agütsütsü nungdakba indang shisasalemtepa liasü. Iba kasa sentong nung adenertemi DALT nung lenir tajung asür Wb.Jongpong tawa dengue tashidak agi asüsang bilemteta pa nem akhüm agüja ola madoki sarasademba mapang tatsüka agia liasü.

Iba sentong ya Dimapur

District Hospital Blood Bank nung tenep nungi tenzükoga anogo ishika maneni aotsü ta angazüker. DALT lenirtemi nübortem dang pei zü agi tangar taküm ka kümzüksü atema azü tenla mulungsua agütsütsü mepishia metetdaksüogo. Temang nung timtem malirtem asoshibo azü tenla agütsüba agi pei mang nung timtem masü teyariang angur ta doctor-temi ashir.

Kaiminthang Singsong Mr. Chümoukedima Season 2 kokogo



Dimapur, Mongputeni/ October 2 (TYO): St. Joseph hr sec school Chümoukedima nungi Kaiminthang Singsong-i Mr. CHÜMOUKEDIMA season 2 kokogo. Iba sentong ya Hotel Season den longiemer Meraki Entertainment-i ayongzük aser

Almighty Nagaland-i teyari agüja Chümoukedima Nagaland bamboo Resource Centre nung September 30 nü agia liasü. Meraki Entertainment-i sangdong ka ajanga ashiba agi, takoker asemprongla MISTER NAGALAND MAN HUNT

3buba nung indang indanga shilem agitsü.

Iba tetoktepa nung Tetso college, Chümoukedima nungi Yimwapang jamir aser of St Joseph hr sec school Chümoukedima nungi Keneingulie Kuotsu na first aser second runners up liasü.

Iba sentong nung Miss Nagaland 2nd Runner up Jentiren Jamir alakteta jaoker liasü.

Tetendangertem rongnung Toshizen Longkumer, Supou Khiam, Talikaba Longkumer, Vitoka Assumi, Thejasekhose aser Dr Nukshi Esther nung densema liasü.

Iba tetoktepa nung nisung 15-i shilem agia liasü.

Changtongya lanurtem angzukshiba sentong agi



Dimapur Changtongya Fellowship purtemi ayongzükba sentong nung adener lanurtem den Rev.Kilang Jamir noksa nung angur. (Dimapur, October 02,2023).

Dimapur, 2 Oct. (TYO): Dimapur Changtongya Fellowship (DCF)-i, Dimapur nung aliba Changtongya lanurtem asoshi "One day Retreat" sentong tajung ka ayongzuka katsuogo. 'Terenemet Lanur' omen nung ajemdaker October 2, 2023 anogo iba sentong ya Don Bosco School, River Belt Colony Dimapur AIDA hall nung agia liasü.

Iba sentong nung lanurtem dang shisalen sayurtemji - Mrs. Merensola Imchen, Chaplain cum Counsellor, DMHSS aser Mr. Temsutoshi Longkumer, Financial Consultant, Free Lancer liasü.

Iba sentong nungsa Tsungrem tenzükur Rev. Kilang Jamir, Director, Youth Harvest Ministry ajanga Tsungrem o jembi aser Rev. Talimeren Longkumer, Director,

Nehemiah Vision Trust ajanga morning devotion agia aser Mr. Imlitemsu & medemertem ajanga kentenba nung ania liasü.

Lanurtem takum nung sorkar mapasa munguaka kodaser mapa balala inyaka takum jangratema litettsu ta asuba indang iba sentong nung angazükba den densema ano lanuwa mapang Yisu tejangja meteter tepela nung teti alitsuba indanga shisatsu jenti angazuka liasü.

NCC Girls band training tenzükogo

Dimapur, Mongputeni/ October 2 (TYO): Kartavya Path, New Delhi nung Republic Day Parade 2024 nung North Eastern Region tening nung shilem agitsü atema NCC tetsür Cadet 50 anogo 10 agitsü aliba training camp ka nung shilem agidar.

Training camp ya October 2 nü Saint Mary's Cathedral Higher Secondary School, Kohima nung tenzükogo. SFS High Secondary School Guwahati nungi cadet 25 aser St Mary's Cathedral High

Secondary School, Kohima nungi cadet 25 den instructor staff tem iba camp nung shilem agidar.

Camp lapokba sentong nung Group Commander, NCC Group, Kohima Brig PS Sangwan-i cadet tem ayongzükba den parnok den sensaksema liasü. Paisa iba sentong nung shilem agitsü mangoka ngutetba atema parnok nem tenüngsang agütsü aser parnok kinungertem, lokti aser state nema dangdaksütsü asoshi ajungshia liasü.

Royal Enfield Mokokchung teloki Mokokchung Press Club nem tetushi agutsü



Mokokchung nung motorcycle anishirtemi tentetba Royal Enfield Mokokchung teloki REM Honorary Award 2023 Mokokchung Press Club nem agutsür kelen REM telok aser MPC pur külemi tangokba noksa.

Mokokchung, Mongputeni/ October 2(TYO): Mokokchung nung motorcycle anishirtemi tentetba Royal Enfield Mokokchung(REM) teloki Mokokchung nung osang zülur telok nem tetushi agutsüba sentong ka October 2 nü Top Floor Cafe,Mokokchung nung ayongzükoga.

Royal Enfield Mokokchung(REM) telok ya 2018 kum July 21 nü parnok motorcycle anishir mulung ajemer par 8-i tentet aser tang parnok züngsem ajak agi 30 lirta REM telok tentetba indang REM Chief Temjen Yaden-i jembidang metetdaksü.

REM Chief-isa parnoki iba talongtsü nung anir senzüba kisüngji dang masü,saka parnoki iba REM telok maongka agia alima ajungtsü asoshi maptong balala inyaker aser item rongnung parnok REM tentetba anogo July 21 nü ya kum shia parnoki alima tzü mupong peria kadaktsütsü asoshi shilem tilaka agia süngdong atemer aser ano iba amala mesükba mapa balala inyakba den REM telok-isa kum shia October 2 anogo ya REM Honorary Award agutsüba anogo amongerta ashi.

REM Honorary Award ya takum agi pungobenbuba agutsür,kija aser telok balala shirnoki nübur tajangzük kadaktsütsü asoshi inyaker itemji reprangteta aguja arur. Pezüben tashi aguja arudang lenla balala nungi repranga Govt.High School Longkhum, Talimayang Traffic O.C Mkg., Mokokchung Municipal Council, Soul Care Home Chami Village ta nem agutsü.

Nüburtem nem osangtsüsang tapu balala bendena zülua nübur nem aguja züngdaksüba den nübur asoshi amang sangwa metitemi mapang,takum, shisatsü aser tangatetba ajak agi anibelem mesasai nübur tenzükba ngua 2023 kum asoshi REM Honorary Award agutsütsü Mokokchung

Press Club shimtet-ta REM Chief Temjen Yaden-i REM Mokokchung tenung nung metetdaksü.

REM Honorary Award 2023 agizükur kelen Mokokchung Press Club Tir Limalenden Longkumeri mapang tatsüka agia jembidang Mokokchung nung osang zülurtemi inyakba reprangteta Mokokchung Press Club(MPC) nem iba tetushi sempet agutsüba asoshi MPC tenung nung tepelaba metetdaksü

MPC Tir-isa Mokokchung nung osang zülurtem nem tetushi aguja sempettsüba mali asü saka tanu REM Mokokchung teloki REM Honorary Award 2023 agutsüba ya mezüngbuba lirta metetdaksü.

Iba osang züluba mapa nung ya timtem jenti ajurur aser mapa ya kanga dang tasak saka tanga mapa nung taah talang anguba ama masü saka inyakba dak malang taah angur, Nagaland nung mapa yari masü saka ishitiba aser tamajungtiba taah anguba mapaji osang züluba mapa ya lir, saka item ajakji arema Mokokchung nung osang zülurtemi nübur tenzüktsü angateta inyaka arurta MPC Tir Limalenden Longkumer-i ashi.

REM Mokokchung telok talongtsü anir senzübaji alima nung telungjem kadaktsütsü asoshi, kasaji Mokokchung nung osang zülurtemi osang züluba ajanga alima nung telungem kadaktsütsü nükjidong yur zülur, aji asünung telok anaprongi iba mapa ano maneni meranga inyaktsü MPC Tir-isa telok ana nungi adenshia aliba züngsemtem ayongzük.

Iba sentong tenzükoga Tsungrem lenisüba jazükur REM Deputy Chief Imtiyanger-i sarasadem aser Moasünep Pongener-i sentong ketdangtsüa aniba den tarur pela agizükur jembi aser tatem nung tesenteper ajak külemi sarasademmer iba sentong tembang.

Uttar Pradesh nung ali mechi nung raratepdang nisung trok asü

Lucknow, October 02

(Agencies): Hombarnep Uttar Pradesh state nung Rudrapur kübok Fatehpur yimda ali tsütsü mangatettep ken o ka nung rara adoka kibong ka nungi züngsem pongu densema nisung trok süogo.

Ali mechi nung rara adoka Satyaprakash Dubey'er kibong züngsemtemi taoba mapang district panchayat züngsem, Prem Yadav amak. Parnoki techira oset amshia Prem Yadav tepset. Iba sülen Yadav pusemertemi Dubey'er ki amakdang Dubey densema kibong züngsem 5 tepset.

Mapang talangka nungi kibong ana tsüngda ali mechi nung mangatettep adoka liasü. Küm tenet tejaklen iba ken o bentetter liasü saka maneni tsükchitepa dang aru.

Iba tatalokba dak sendakba nung nisung ana puogo, ta Special DG, Law and Order, Prashant Kumar-i metetdaksü.

District Magistrate, Akhand Pratap Singh-i, atangji iba tatalokba ya kibong ana tsüngda ali tsütsü mangatettep adoka agi lir, ta metetdaksü.

Uttar Pradesh Chief Minister Yogi Adityanath-i ozüing amba agencies dang aibelenertem nem temerenshi agüjang, ta tuyuogo. Paisa takoksa angur kibongtem den mangyim jashi lemsatepba den külemi ketdangsertem dang yirua alirtem tajungtiba nung yaritsü tuyu.

Ano külen opposition Samajwadi Party aser Congress natibo iba tatalokba ya temaba jenjang nung bushisüngdangtsüla, ta takhangba agütsü.

Congress-isa state nung tensa tamajungba akümer ta shia state sorkar aija, Yogi Adityanath-i aniba sorkari state ya ozüing alema inyakba tiyongtsü tesem ka kümdaktsüogo, ta aitsü.



Amritsar, October 02, 2023: Hombarnü Congress lenir Rahul Gandhi-i Amritsar nung aliba Golden Temple nung sarasadem dang tangokba noksa nung angur.

Delhi Police-i ISIS kiralongrar asem apu

New Delhi, October 02

(Agencies): Hombarnü Delhi police-i Islamic State (IS) kiralongrar asem puogo; par asemji National Investigation Agency (NIA)-i tebushidak aliba kiralongrartem liasü. Delhi police special cell-i mita aoba mapang nung par asem apu.

Police-i sangdong ka ajanga, "Parnoki North India tesem balala nung kiralongratsü tebilemba liasü. Parnok ket nung IED bomb yangludang amshiba osettem densema tashishitsü oset aika angu," ta metetdaksü.

Par asem rongnung kabo Shahnawaz lir ta jangjaogo. Pune nung ISIS ken o ka dak sendakba nung pa apur/tepseter nem senpet lakh 3 agütsütsü sangdonger liasü. Pa ya engineer ka lir aser pai pa maitsü mimshia Delhi nung telidak liasü. Tang Police-i par asemprongla dang asüngdangyadar, iba sülen ang osang tejangja sangdongtsü. Taoba ita National

Investigation Agency-i kiralongrar pezü noksa sangdonga liasü, aser parnok rongnung Shahnawaz densema lir. Pune ISIS (Islamic State of Iraq and Syria) ken o ka nung parnok apur nem kiralongrar shia sen lakh asemsem (lakh 3) senpet agütsütsü sangdonger liasü.

Shahnawaz ya tamalen Pune police ket nungi jena aoba sülen pa maitsü mimshia Delhi nung telidak liasü, ta Delhi police-i metetdaksü.

Delhi Police Special Cell-isa ano kiralongrar kar pua lir aser maneni bushisüngdang.

Taküm July 17 ayaterm nung Pune Police-i Shahnawaz pua liasü. Pune kübok Kothrud kiyong nung motorcycle ka auyatsü lia police-i pa apu.

Bendanglen nungi kiralongrar kati Shahnawaz den mapang shia tongtepratepa pa den kiralongrar kari kiralongratsü atema asalentong yanglur liasü, ta parnok dang asüngdangyaba ajanga bushitetogo.



October 02, 2023 nü New Delhi nung Mahatma Gandhi asoba anogomung nung Tir, Droupadi Murmu-i Rajghat semdanga asür nem akhüm agütsüadang tangokba noksa nung angur.

Bihar Caste Census sayaogo; OBCs aser EBCs nütsüng shilem 63 lir

New Delhi/Patna, October 02

(Agencies): Hombarnü Bihar sorkari caste census report sayaogo; state nung nütsüng shilem 63 bo OBCs aser EBCs nütsüng lir, nütsüng shilem 27.13 backward class, nütsüng shilem 36.01 kanga backward class aser nütsüng shilem 15.52 general category nung lir, ta iba survey ajanga bushitet.

Centre nung Narendra Modi-i aniba sorkari, linük census nung SCs aser STs dak alaka tanga caste census bo magitsü, ta sangdongba sülen küm ka shi lir Bihar state-i caste census agia iba osang sangdonger.

1931 küm India nung caste census agiba sülenbo tanü tashi khen danga magir.

Bihar Caste Census report ajanga, state nung nütsüng teimtibaji OBC group nungi Yadavs lir aser parnok nütsüngji shilem 14.27 lir, ta metetdaksü.

State nung nütsüng shilem 81.99 Hindu nung lir aser nütsüng shilem 17.70 Muslim

nung lir. Scheduled Caste (SC) nütsüng shilem 19.65, Musahars nütsüng shilem 3 aser Brahmins nütsüng shilem 3.65 lir, ta kasa report ajanga metetdaksü.

State nung Khristantem, Sikhs, Jains aser Tsüngrem dak mamangertem nütsüng ishika dang lir; parnok ajak senteper nütsüng shilem 1 den tajemba lir.

Bihar sorkari state nung caste census agiba anema Patna High Court nung temepishiba ken otem benoka liasü saka court-i magizükba ajanga state nung caste census agi.

Melungtet telok 'Youth for Equality'-i caste census anema ken o benoka liasü. Parnok atema ken o jembitsür, advocate CS Vaidyanathan-i, iba census ya nisungtem nija temeden anema lir ta court nem metetdaksü.

Iba mapang nungji high court-i, "Iba (caste census agiba) ya tim dang ama onoki angateter, kechiyong iba ya ochi

nung terenlok agütsütsü nükjidong nung lir," ta metetdaksü.

Congress-i linük tesem ajaklen caste census agitsü akhanger, aser ibaji pusema Bihar Chief Minister Nitish Kumar-i, iba ya loktiliba nung nübur ajak ajangzükdaksütsü atema lir, ta ashi.

Bihar nung BJP unit-ia linük tesem ajaklen caste census agitsü pusemer saka tang tashi nung Centre sorkari telangzüba magütsür.

Hombarnü chief minister Kumar-i, "Caste nung ajemdaker agiba census ajanga castes osang jangjaba dang masü saka nütsüng ajak rongsenkettsüng dak sendakba jenjang meteter. Iba nungji ajemdaker nüburtem ajak ajungkettsütsü aser terenlok atema inyaksü," ta ashi.

RJD Tir, Lalu Prasad Yadav-ia, "Iba ya ajanga onoki Centre nung sorkar akümdang linük tesem ajaklen caste census agitsü atema ayongzüktsü," ta metetdaksü.

Karnataka nung Eid mapang raraba atema nisung 60 puogo

Shivamogga, October 02

(Agencies): Karnataka kübok Shivamogga district nung Ragigudda anasa Eid benjung mapang tamangba yimsü ana amangertem tsüngda raraba dak sendakba nung Hombarnü nisung 60 puogo aser ken o 24 benokogo, ta Shivamogga Police-i metetdaksü.

Karnataka Chief Minister, Siddaramaiah-i, tamangba

yimsü dak sendakba sentong agiba mapang lung amshia amakertem magizüktsü, ta metetdaksü.

Raraba tensa azioktsü atema Hombarnü nungi tenzüka Shivamogga district administration-i curfew ozüing benoka lir.

Siddaramaiah-i, "Tangbo tensa aziokteta lir. Police-ia lung amshitsüsa aküm.

Tamangba yimsü sentongtem nung tangar nem timtem agüja lung onloktsübaji tim masü. Ozü sorkari item amaji khenyongi magizüktsü," ta metetdaksü.

Eid mapang nung lokti tulu adenshia Milad-un-Nabi processions agir, ajisüaka tanga tamangba teloki timtem agütsüba ya mapang shia ataloker.



October 02, 2023 nü New Delhi nung Lal Bahadur Shastri asoba anogomung nung Ato kilonser, Narendra Modi-i Vijayghat semdanga asür nem akhüm agütsüadang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, MONGPUTENI (OCTOBER) 03, 2023

Tantsür tambur Anepaluyim

Yakanü alima ajunga nung tantsür-tamburtem anogo mungogo. Iba anogomung ya tanurtem anogomung amonger amai kanga tongtibang anogo lir, kechiyong tantsür-tambur akümbaji alima meimchir yimya nung tanaben tanur kümshiba mapang lir. Atangji, nisung ka taküm nung tantsür mesüra tambur akümbaji angati masü, aji peisasa pei taküm libaliru yimya agi aazükba sempet aser temoatsü lir. Ano, tanü putu nungbo tepela aser temoatsü kaji, libaliru taküm yimya aser achiajem tajungba akümba agi nisungtem ya küm nung tain kümaka shi temang tereprangtsü nungbo tantsür tambur makümer. Aji oda, küm tir aser tukor taintemi peisasa gari anir nungdak senzüba angur aser shisa meramai temunglung züngzünga akhidang ajanga süiba mapatem indang küm aser anogotem mamai jembir. Itemji teindang nisungtem asütsü. Itemjibo lanurtemi akümtsübutüla. Atangji, tantsür tambur küma alibaji tapi agibo masü, parnokji tanur asüdang tsürabur tashi angaa alirtem aser tain kümer peisasa pei shi azü azüoka alir aser temeim mapa inyakertem asütsü. Aji oda, tantsür tambur akümba ya nisung ka taküm nung takok tulu lir, ibayongji United Nations-i dena tantsür tambur küma arrshia alirtem nem akümtsübu agüja October ka nü ya küm shia tantsür tamburtem anogo amunger. Atangji, tereprangtsü nungbo tantsür tambur masü amai asütsüa akok saka kodang nisung ka tantsür tambur kümdir pa mesüra la shisatsüji lanuba akümer, tetezü tanur kümshir, anungji parnokji tangar nem meimdaktsüner, teyari imlar aser melamelaa pelar aser melamelaa jashir. Iba mapang aser yimyaji meteta kodang tsüraburtemji tanurtemi anepaludir, tsüraburtemi tanurtemi tala asüdang anepaluba meyipa agütsür amai bilema pelashishia anepalutetsü. Tanü asen loktiliba nung kibong aika nung tsüraburtem tantsür tambur kümer pei chirnurtemi mereprangi sendoka toktsüba tsüraburtem aika lir. Ibaji shitakba nungbo tsüraburtemji masü saka chirnurtemji tia maka asütsü, kechiyong pei tsürabur dang memeimba jala aser jabasoji jangratema malitsü aser pei taküm tatembang tiaji pei tsüraburtem dang nungi tamajungba tia nung tembangtsü. Atangji, tantsür tambur kümerbo taküm junga aliyonga, külem medemsortem anasa otsü atonga kazütsüsa mali, kanga azüngmeyaker. Iba jagi tangalenbo tantsür tamburtem alidak "Old age Home" yanglutsür aser yangji tantsür tamburtem külemi lidaktsür. Aja jangratemtsüka. Ajisüaka, tanü tashibo asenok sobaliba tajung kaji, kidang makamait agi timtema liaka, pei tsürabur kidang nungi anir oa tanga nung lidaktsütsüba chirnur aikati temulung agi matur, anungji asenokbo tatem tashi tsüraburtem den meimtepa yaritepa külemi alir. Iba jagi asenok sobaliba ajungba indang sayur. Ajisüaka, tanübo asenoka temetetba aser tangatetba putu ka nung alir asünungji, kidang nungi bendanga oagi tantsür tamburtem ki ka nung balaka anidena melidaktsüaka, parnok azüngapong mesüi jangratema medemertem den otsü atonga alitsü atema, yimtak yimtsüng nung süli, town nung süli, anüngdang tantsür tamburtem ajurutepe otsü atonga kazüdak ki ka yanglua toktsütsüba kanga nungdak kümogo. Iba kidangji yongsen mapa tapu balala inyaktsü toktsütsüa akok mesüra kakat tapu balala bendena toktsütsüa akok. Item nungji parnok mapang tao memeteti pelatepa alitsü. Idakji anüngdang chiyongdaktsütsüa akok mesüra süngo jemdaktsütsüa akok. Aji oda, mapang apir parnok ken tena sarasadem mapang agiba sentepa alitsü akok. Idakji, parnok rongnung pei ajangshiba otsü aser taküm kuli lemsateptsüa akok. Ano, khenkhenbo lanurtem dang akhi tejen otsü ashiba sentonga ayongzüka alitsü akok. Iba dakji alaka tsüraburtemi melinüdak asen den asüyonga kangshia mayutsüla, iba jagi parnok tokolok dena shirangdaktsütsü. Asen tsürabur asütsüa akok, masütsüa akok, shiba südir sang, nisung shingaia tantsür tambur mezüngmeshi masütsüla, kechiyong Tsüngremi dang aochira, kenü anogobo nia parnok amaji tantsür tambur akümtsü ta peisasa bilema kümdanga alitsüla. Asen tsürabur onüla aser okola asütsüa akok mesüra ojala aser obala asütsüa akok, aseni parnokji koma meima anepalur, yamaji asenoka arrshia alitsü aser iba amaji asen chirnurtemia asen anepalutsü.

OLEMSABANG

Aya, ya arishi süktemer-a na! ta yimdangi arur

~ Lanu Atsongchanger, 2023

Anepdang züngia tenük saker,
Anogo tepiyong atema sentongtem yanglur
Yepden nungi sakdi asü nung mokoki akum.
Aya, ya joko arishi süktemer-a na! ta yimdangi arur.



Kidang chirnur den saku mapa inyakdang,
Saka aki anogotem ama mesüi akum nung,
Chirnurtemi "nai makoktsü, nong" ta nokdang dang,
Aya, ya joko arishi süktemer-a na! ta yimdangi arur.

Medemsortem den aki anogotem ama
Yak-yaka aki alu inyaktsü sentonger,
Saka tashi agi mokoki akum nung,
Aya, ya joko arishi süktemer-a na! ta yimdangi arur.

Temang tajungtiba merük-mejudanger,
Sobutsü tajungtiba sobudanger,
Saka menerem jak tajungtiba agia mazü akumdang,
Aya, ya joko arishi süktemer-a na! ta yimdangi arur.



Tzücum tatempang nung nokdaker
Anü lu reprangzüka yokdang,
Alima tepur tajung joko mangutsü südi.
Oh! saka ni Kibuba den ajuruteptsü yongyar.

Tanü ni taintet rogo nung züngsem dang,
"Tza! tenük mashipshi nung arishi omar na!" ta longrar.
Aji saka adangji ya Tsüngremer temoatsü tulu,
Kibuba anogo kü dangi arutsü yongyaa ni atar.
Amen

MISSION TO THE NAGAS ASER OKADAK AROGO OTSÜ TEMETEN BUSHIBA : O RAJEM

~ Molungkimong Literature Board

(Yashi adok nungi...)

Dr Clark-i yimküma yir mezüngbuba züluba shiti aser pa Molungkimong telidak züluba shiti keta nunga 'rishikangshiba' indang shia mali aser aji dang masü, pai yim akümtsüba anogo terok lia züluba shiti (Clark's letter to Murdoch dated 18 October 1876) nung küla yim tasen akumtsüba indanga memetet liasü ta ajitetter. Iba shiti nung pa indang postal address ji 'Haimong village' asütsü ta lephshia ashiba dang lir. Pai küla putu nung rongrong adokba jia memetet liasü aser pa bo mission mapa atema jaka tajung bushia anidaka ayiba dang ('The land was deemed much more fertile and easy to cultivate than that about the old site.' Clark's letter dated 21 March 1877).

Anungji, 24 October 1876 nung ya rishikangshiba ajanga arogo bener ayiba masü, tamangertem kar den Dr. Clark anidaka yiagi station tasen ka mesemba dang. Molungkimong nung Dr. Clark matudang nungi liasüba arogo jibo Godhula, Lucy, Supongmeren aser parnok tanünger tamangertem metangdangi bener oa liasü.

Kimong tasenbai ayiba sülen, 1877 küm Dr Clark mission station ji Amguri liasü aser iba mapang correspondence address ji Naga Hills, Morar Bazaar, ta amshia liasü. June 2, 1878 küm kodang Molungyimsen nung mezüng baptia mission mapa tenzü, Molung Station ta nungja agütsü. Yamaji, liyonga arudang, 1894 küm Mission Station ji Molungyimsen nungi tesem tajungba bushia, Impur-i atu.

7. "Rev. Dr. Clark tebutü Mary Mead-i Molungyimsen nung school tenzüka A.B.C ta aser 1.2.3 ta mesayu tashibo Ao kin otsüji tebang o dak alaka zülubanglu kecha maliasü..."

Molungkimong nung Supongmeren 1870s nung Dr. Clark aser Mary Mead-i Ao oshi tesayur ka ama itasen agüja ayu. Pa ajanga missionarytemi Ao oshi aser Aor sobaliba angazük aser Iba indang kuli 1874, Specimen of Languages of India page 254-269 nung jangja jangja zülua angur.

Aortem aikati Naga Hymns by Godhula Brown, koba 1879 kum A.K Gurney, Mission Press, Sibsagore nung yanglu, ibai mezüngbuba Ao oshi (Ao literature) kakat ta bilemer saka Supongmeren-i sayuba ajanga 1874 küm mezüng Ao literature kakat adoker liasü.

Aji dang masü, Dr. Clark Molungkimong-i March 1876 nung aliba mapang, Godhula denati Ao oshi 3000 shi indang vocabulary yanglur liasü ta Home Board dangi shiti züluba nung angütsü.

Anungji Molungyimsen kümer külenang ABC aser 123 zülua tenzüka masü. Formal education metenzükyongbo, Supongmeren ajanga Ao Naga Literature indang milenbo tsükloktsür liasü.

8. "Süra Molung ana, Khensa aser Meküli tsüngda nungji kechi tepila ali?"

Iba tatalokba ana ya kenyongi balaka lir. 24 October 1876 nung Molungkimong nungi yim tasen küma aoba otsü rasa shiogo aser iba nung rishikangshiba indang kecha kuli mali. Mesüra, ibai British sorkari tamanger-o mamanger na bentetsüba masü. Lim arogo ajak indang otsü bushia aotsüji tamakoktsü saka mezüng arogo otsü benteta ayutsüba jibo Mungdang aser ajak indang khuret lir.

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Mexico nung Tenla ki ka chirepba lendong nung nisung 9 asü



Tenla ki chirepba tesem nung kümzükba maparen inyakdang tangokba noksa nung angur.

October 02, 2023: Amongnü (October 1, 2023) Mexico nung aliba Tenla ki ka kilem chirepba lendong nung nisung 9 asü aser 40 yiru; iba dak alia nisung 30 shi samar bushidar, ta ketdangsertemi metetdaksü.

Iba lendong nung nisung 30 shi Tenla ki chirepba jana agi nembanga alitsüa akok, ta bilema aoung-sangwa methitemia bushidar.

Ciudad Madero yimti nung aliba Tenla ki kilem chirepba sülen mokozü ama anüngleni atuba, iba sülen Tenla ki chirepba noksa social media

nung prokshio.

Iba lendong nung nisung 9 asüba jangjaogo aser nisung 40 shi yirua hospital-i anir ogo, ta Tamaulipas state nung Security Minister atema otongdar, Jorge Cuéllar-i metetdaksü.

Osangbener den jembidang Cuéllar-i, jana-ona indoka nisung bushitsü atema osettsüset/gol balala bener aruba atema businessmen kar dang pelaba lemsatop.

Tampico nung Roman Catholic Arogo nung Bishop Jose Armando Alvarez-i, Tenla

kidang tamangertem Kibuba benjung agiba mapang nung iba lendong atalok, ta metetdaksü.

Arogoisa yirua alirtem tenüng sangdongogo; parnok rongnung arrshi ita pezü kinü tanur ka, küm asem tanur ka aser küm ana tanur ana densema lir.

Arogoisa sangdong ka ajanga, "Kümzükba maparen inyakertemi jana nungi nisung aika kümzükogo; iba atema Tsüngrem nem tenüngsang agütsür. Maneni sarasademjang," ta mepishia metetdaksü.

Khristan kiyimba sentong nung lendong atalokba bushisüngdangtsü akhanger

Baghdad, October 02 (Agencies): Taoba Hombarnü (September 25) northern Iraq nung Khristan kiyimba sentong ka nung mi lendong ataloka nisung 100 dak tema asüba tatalokba international jenjang nung bushisüngdangtsü atema Khristan lenirtemi akhanger.

Iraq nung Khristan putir kati, linük tesem ajaklen ochimashi lir, ta metetdaksü.

Phone ajanga osangbener den jembidang putir, Boutros Sheeto-i, Hombarnep kiyimba sentong nungji par kibong nungia züngsem pongu asü, ta metetdaksü.

Paisa, nisung kari asa-a mi lendong ya atalokdaksüogo, ta tai tongloksü. Ajisüaka pai iba kuljibo kecha magütsü.

Nineveh province kübok Hamdaniya jila nung aliba Haitham Royal Wedding Hall nung mi lendong nungji nisung 107 asü aser 82 yirua liasü.

Amongnü (October 1) Iraq sorkari sangdong ka ajanga, fireworks tim mesüi amshiba ajanga iba lendong atalok, ta metetdakja liasü.

Putirisa, "Iba lendong ya asalentong yanglua atalokdaksüba lir, anungji iba tatalokba ya international jenjang nung bushisüngdangtsü onoki akhanger," ta metetdaksü.

Ano külen Rome nung Chaldean Catholic Cardinal, Louis Raphael Sako-ia, "Iba mi lendong ya nisung kari metetsümonga atalokdaksüba lir," ta ashi.

Taküm July ita nung ang Sako-i Iraq yimtiba Baghdad nung aliba headquarters toktsür liasü.

Ano Iraq nung Khristan lenir Syriac Catholic Archbishop of Mosul, Benedictus Younan Hanno-i, international jenjang nung bushisüngdangertemi iba tatalokba ya bushisüngdangtsüla, ta takhangba agütsü.

Sorkari bushisüngdangba ajanga bushitetba report ji Khristantemi magizükteter, ta pai ashi.

Hombarnü Nineveh Heath Department-i, iba lendong nung asür ajak agi 113 jungogo aser asürtem rongnung nisung 41 maitsübo mejangjateter, ta metetdakja liasü.

Iba lendong nung yirur nisung 12 bo treatment atema bendangleni anir ogo aser maneni nisung 8-a bendangleni oa treatment agitsü.

IS kiralongrartem merenba mapang nung Mosul, Nineveh aser Hamdaniya ama jilatem nungi Khristantem aika jenshia liasü.

Khristan nütsüng teimba

aliba jila- Hamdaniya nung Khristan kiyimba sentong nung mi lendong nungjagi kiyimsang aser kiyimla nabo jenbuteta liasü.

Iba tatalokba sülen Mosul nung tongti putiri sorkar dang kiyimba sentong nung mi lendong atalokdaksür ajak nem temerenshi agüjang, mesüra Khristantemi linük tesem ajaklen longkak aittsü, ta metetdakja liasü.

Benedictus Younan Hanno-i, "Mi lendong atalokdaksürtem nem temerenshi agütsütsüla, mesüra onoki longkak aittsü. Onoki onok (Khristantem) aliba tesem nung dang masü saka Iraq tesem ajaklen longkak aittsü," ta metetdakja liasü.

Bodhbarnü Iraq-i iba lendong nung asürtem atema linük tesem ajaklen anogo asemnü mangyimtsü sangdonga liasü. Kurdistan Regional Government (KRG)-ia kasa sangdongji metetdaksü.

2014 küm nungi Iraq nung Islamic State kiralongrartem merenba mapang nung Khristan nütsüng kanga ajema aküm.

2003 küm tashi nung Iraq nung Khristan nütsüng million 1.5 shi liasü saka tanübo Iraq nung Khristan nütsüng 150,000 shi dang lir.

ANO GO ABEN TSÜNGREM DEN

Molumi

Molumi (Hell) iba O ya Anglo Saxon O nungi agizükba O. Ibai tasürtem alidak mesüra tasürtem tanela alidak ta amshia aru. Tawa-tanü English oshi nung ibai aibelener temerenshi agütsüdak ta amshir. Ibri O nung Sheol aser Grik O nung Hade, anapronglai manguba asür lima ta ashir. Tasen Lai ibai tamajunger alidak lima ta amshi mesüra tetsükba tenyar merenshidak ta amshi. "Kechiyong kodang kotak tenyartemi temenen mena, Tsüngremi parnok mapayu, saka molumi nung inok aser O bendangba anogo asoshi ayutsüsa, ongken tammang nung puok." (2 Peter 2:4).

LAISHIBA : Molumiji Leper : T. Mapa 2:31 pai aji apitetta Khrista shia aruba indang jembi, oda pa tasü yim nung metoktsü mesüra pa mang shizüka moudaktsü.

J. Adok 20:13 Aser tzüyimi pei dak aliba tasürtem bendanga agütsü; aser nisung shia pei mapa amato O bendang. Aser tasüba aser tasü yimji molumi nung inok. Iba ya tanabuba tasüba, oda mi kangla.

Mat. 11:23 Aser Kapernaum, na anüng tonga mesotsü ama? Na tasü yimli alutsü kechiaser koba mapa tulu ne dak inyak Sodom nung inyak asübo, aji tanü tashi lila.

Mat. 13:42 Aser tamajung benschirtem anitentsü, aser misem nung puoktsü. Yangji ajepba aser tepu shitepba alitsü.

Luke 16:23 Aser pa tasü yim nung kanga kangshia alidang pai tenük sakloka reprang aser talang nung Abraham aser pa teku nung Lazar angu.

2 Peter 2:4 Kechiyong kodang kotak tenyartemi temenen mena, Tsüngremi parnok mapayu saka molumi nung inok aser O bendangba anogo asoshi ayutsüsa ongken tammang nung puok.

J. Adok 14:10,11 Tsüngrem ain adokba marok nung Pa ain adokba yi koba memeyoktep renema lir, aji paia ajemtsü. Aser temeshi kotak tenyartem madang san chanu madang mi aser mitsüktsü mozü agi pa kangshitsü. Aser parnok timtem mokozü teti tatem makai atur; aser shirnoki iba shiruru aser süngyanglu bilemer, aser pa tenüng temaitsü agizük, mangli sangwali parnok anisüngzük maka.

J. Adok 20:10 Aser parnok telakoktsüba mojingji, mi aser mitsüktsü mozü kangla nung, kong iba shiruru aser tiyazü ainakar alir, idakji puok aser parnok mangli sangwali teti tatem makai tekangshi alitsü.

MOLUMI-I YOKERTEM : T. Ken 9:17 Tsüngrem amadokba kina ajak tena tamajunger Sheoli alutsü.

Mathi 5:22 Saka ni nenok dang ashir, shibaisa pei adianu dang rasadir pa obendangba lendong nung alitsü aser shibaisa pei adianu dang, yiar, ta jadiri pa mungdang tsüngdang lendong nung alitsü aser shibaisa na suwar ta shidir pa molumi lendong nung alitsü.

Mathi 23:15 Nenok tezalur aser Farisi, anemtem aiatai!... pa yamaji akümdang nenoki pa nenok anasü agi tali molumi chir kümdaktsür.

O Tsüngrem, ni molumi lendong nung malitsüsa Ne O ajanga ni kümdangdakjang. Amen.

AO OSHI ANGAZÜKDAK:
TANÜ ANGAZÜKTSÜBA OJANG



Sangkhu

(n) terongdong nung sü agi sangzua khu abentsü yangluba (traditional rucksack)

* Akhidangbo sangkhu nung dang chiyongtsü bener jaja.

Sangküm

(n) taruba küm (next year)

* Sangküm küm lanur aika kibong akümstsü.

OLONG PAITEP # 6655

1					2				3
							4		
5		6			7				
8									9
							10		
				11	12				
		13							
14					15				
				16					

TIPIEN

- 1. Ojembitsü tashi - 8
- 5. Súngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6654 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER MA

TANG TASHI NUNG ADOKA ALIBA ANDROID VERSION TEM

- Android versions 1.0 to 1.1: The early days
- Android version 1.5: Cupcake
- Android version 1.6: Donut
- Android versions 2.0 to 2.1: Éclair
- Android version 2.2: Froyo
- Android version 2.3: Gingerbread
- Android 3.0 to 3.2: Honeycomb
- Android version 4.0: Ice Cream Sandwich
- Android versions 4.1 to 4.3: Jelly Bean
- Android version 4.4: KitKat
- Android versions 5.0 and 5.1: Lollipop
- Android version 6.0: Marshmallow
- Android versions 7.0 and 7.1: Nougat
- Android version 8.0 and 8.1: Oreo
- Android version 9: Pie
- Android version 10
- Android version 11
- Android version 12
- Android version 13
- Android version 14

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Arunachal: Sela Tunnel December itabo renemtsü imlar



Sela Tunnel yangi noksa nung angur.

Itanagar, Mongputeni/ October 2 (Agencies): Arunachal Pradesh kübok Tawang nung Sela Tunnel ya iba küm tatem tashi nungbo lapoktsü imlar.

Iba project ya kanga dang tongtibang ta züngshir aser iba ajanga Arunachal Pradesh kübok Tawang nung "all-weather" connectivity agütsütsü.

Border Roads Organisation (BRO)-i sangdong ka ajanga

ashiba agi, Sela Tunnel ya shilem 96 shibo renemogo.

Tesemdangertem atema iba tunnel ya December tashi nungbo lapoktsütsü ketdangsürtem nükkjidong lir.

Iba tunnel ya 4,200-metre (13,800 ft) Sela Pass kübok yanglua lir, koba rür alaba aser anentsü aluba ajanga mapangshia shibanger.

Iba tunnel ajanga Tawang aser China den arrtsü nung aliba

tesemtem nem küm tepeyong kecha tetsükdaktsü makai senzisenpongtsü atema teyari agütsütsü aser iba ajanga Indian Army nema teyari tulu agütsütsü.

Tang iba tunnel ajanga tunnel yangluba mapang amshiba garitem dang senzisenpongtsü melar.

Tunnel shilem tuluba kabo renemogo, ajisiüka pavements aser exit/escape tunnel(s) amala tang teyangludak lir.

Arrotsüi CRPF yokba KHNAM-i magizüker

Guwahati, Mongputeni/ October 2 (Agencies): Khun Hynniewtrep National Awakening Movement (KHNAM)-i ashiba agi, Assam aser Meghalaya na tsüngda tang arrtsü dak sendakba nung sensaksem agi parnok temlung masür.

KHNAM-i ashiba agi, arrtsü nung mangatetep aliba tesemtem nung state police melena Central Reserve Police Force (CRPF) yokba ya parnoki magizüker.

KHNAM tir Thomas Passah-i ashiba agi, arrotsü CRPF yokba dak sendakba nung parnok tebilemstsü akar, kechiyong iba ya BJP sorkar tazüokba kübok lir.

Paisa, arrotsü CRPF yokba ajanga Assam nung BJP aniba sorkar nem tajangzük tuluba agütsütsü, ta ashi.

Tibelemstsü ya tali akar kechiyong parnok ya Assam CM Himanta Biswa Sharma den sendaktepa lir.

Pai ashiba agi, lisopurtem

tekümzüka kübok toktsütsü atema state sorkari arrtsü nung aliba outpost tem nungi police tem manintsüla.

September 30 nü Assam aser Meghalaya nati Khanduli nung neutral force ama CRPF yoktsü atema telemtetba agi, kong tensa mejungi küma oya liasü aser iba tesem nung arrtsü dak sendakba nung Khasi aser karbi nungertem tsüngda mangatetep adokba osang metetdaksüogo.

Tripura: CITU-i BJP sorkar aitsü

Agartala, Mongputeni/ October 2 (Agencies): Tripura nung CITU tir, Manik Dey-i ashiba agi, state nung aliba nüburtem 2018 küm nungi kanga timtemtepa arudar, kong mapa manguba aser osettsüt nung jenjang tali küma aoba densema lir.

Dey-i ashiba agi, "sorkari o talanglang jembir aser parnoki inyaktetbatem indang aika jembir, ajisiüka nüburtem tejangraba anema inyaksangshir. Parnoki ration card ajanga oset balala lemstsüba indang ajungketer. Sorkari sen 5 alang masala talep tilaka ajungkettsü atema sen lakh 5 intoker."

Tripura Brick Kiln Workers' Union state convention ka CITU state office nung agiba

mapang pai iba olen lemsatepa liasü.

State nung BJP-i sorkar kümtetba sülen nüburtem kangshitepba indang jembiba mapang Dey-i,"state nung aliba nüburtem oset nung jenjang tali akümba aser mapa inyaksü maongka maliba ajanga kanga timtemtepdar. Nisung aika mapa maliba ajanga ki mesüteter. Kisüjensü ajema akümba ajanga brick kiln nung inyakertem jenjang kanga mejungi kümogo aser parnok tajemtsü tzü, toilets, aser electricity amala tongtibang tenüngdakbatem agi kanga anünger, ajisiüka Labor Department-i kecha ola matoker," ta ashi.

Dey-isa, state nung mapa

shitak minyakba atema Tripura State Electricity Corporation Limited aser Health Department aitsüogo.

Maneni paisa, "sorkari mapa balala asoshi tenüngdakba peria mapa nung nüburtem manioker. Tatishitsü agi doctor pongu nüngdakba tesem nung doctor ka dang alir. BJP sorkari nüburtem libaliro kanga mejungi kümdaktsüogo aser iba den parnok tetsübu nung dang toktsür," ta ashi.

Dey-i item ken o tem ya bentettsü asoshi movement ka nüngdakba lemsatepogo.

Senden nung CITU State Committee General Secretary, Shankar Prasad Dutta aser tanga lenirtemia shilem agia liasü.



Assam kübok Guwahati yimti nung Jalukbari Outpost police team kati mobile phone auyaba telok ka puogo. Iba telok nung nisung pezü lir aser parnok ronung kabo juvenile lir. Parnoki nisungtem ket nungi phone rakzüka liasü. Osang tejangja ka angazükba sülen police-i Deobar aonung Jalukbari tesem meita ao aser parnok ya pua liasü.

Egypt police headquarter nung mi adok, nisung 38 yiru



Ismailia, Mongputeni/Oct. 02 (Agencies): Egypt kübok Ismailia yimti nung aliba police headquarter ka nung Hombarnü mi adoka nisung 38 yiruba sülen iba mi remseptet, ta health ministry ajanga ashi.

Tang tashi asü-amaba osangbo mali saka iba mi anepdang züngia lia adokdang iba ki sünga police tem liasü.

Tekumzüker mezünpur arudang mi ya Ismailia Security Directorate ki ajunga nung jangruadoker liasü. Storey aika atongtepa aliba ki ajunga nung mi jangru aser mokozü agi sünger liasü.

Sangwa arudangbo iba headquarters ya mijang kumer liasü aser mi kaoloka maotsü atema emergency services puri mera kar agi. Social media nung video prokshiba nung nisung kar telung nungi madokteti windows nungi teyari meshia ayimtena liasü.

Iba mi kechi ajanga adokar ano mejangja aser security forces temi iba tesem ya shibangogo aser nisung kar

crane amshia ki telung nungi agiteta liasü.

Interior Minister Mahmoud Tawfik-i iba lendong adokba bushisüngdangtsü totuyuba agütsü aser iba ki indang "structural safety review" agitsü ashi, ta par ministry ajanga sangdong ka nung ashi.

Iba ki nung police mesüra pua alir kwi liasü, item osang tang tashi agüja mali.

Yirur yangji aliba mozüki kati anir aor nisung 26 rongnung nisung 24 "asphyxiation" agi timtema liasü aser ana mi agi ronger liasü, ta health ministry ajanga ashi. Ano nisung 12 yangji anepalua liasü.

Health ministry ajanga iba lendong atalokba tesemi ambulance 50 yoka liasü aser ano tayimtsü ana densema military emergency services liasü, ta ashi.

Egypt nung iba ama kitsük-kirong lendong ya mapang shia ataloker, kong mi nungi kumzüksü mera kangabo magir aser emergency services aibem menur tonga arur.

2022 küm August ita Cairo tekülem ki ka nung electrical short circuit ajanga mi adoka tekülem dak alir nisung 41 asü aser iba ajanga linük nung ki o jen tajungba kumdaktsütsü aser fire brigade temi telangzüba agütsüba reprangshitsü nüburtemi ola adok.

Nisung timba kitsük-kirong adokba ki nungi jena aodang tango mesashiteti akum aser kar windows nungi jena ao, aser firefighter arutsü ghonda junga agia liasü.

Ibai ki majungba ajanga lir ta tenüng asen, kong tekülem ki ya liasü aser iba kiyong nung lenmang ya kanga paitepa aliba ajanga firefighter tem kera marutet.

Küm ter jakdang yangluba mesüra yanglushir aliba police headquarters ter dak tema aliba rongnung Hombarnü iba mi ya ka nung adoka liasü. 2021 küm March ita linük yimtiba Cairo nung textile factory ka nung mi adoka nisung 20 asü, aser 2020 nunga mozüki ana nung mi adoka nisung 14 asü.

TULI TOWN BAPTIST AROGO
P.O. Tuli, Pin-798618
District - Mokokchung : Nagaland

Mulungnen O

Tuli Town Baptist Arogo nung sannüker asütsü Rev. S. Moa Aier aser par kibong ABAM nung tenzüka lia Tsüngremi pa nübo moatsüba atema Arogopur ajaki Tsüngrem tenüng asanger.

10th September 2023 anogo Pastor mapa nung aniokba sentong nung Rev. Dr. Mar Pongen, Executive Secretary ABAM ajanga Tsüngrem o jembi, Rev. Meren Ozüküm Church Co-ordinator ajanga mapa nung aniokba sentong agi, Impur Baptist Arogo ajanga kuli tajung agüja sentong kanga tepur junga takok nung agitetba atema Tsüngrem tenüng asanger. Iba den sentong nung shilem agir ajak dang Tuli Town Baptist Arogo nütsüng nübor ajaki pelaba lemsateper. Tsüngremi Sannüker taküm aser kibong moajangma.

Kibuba mapa nung;

Sd/- **Mr. P.B. Wati Jamir** Deacon
Sd/- **Toshi Jamir** Arogo Secretary

SANGDONGER

Oboula Mongsanger dak jakzük (Ungma Imlang Jamir) koba 12th August, 2023 lokti senden nung longjema alitsü temzüng renem aser shibai raksa-a mesüra tashi mangar, ama-litep malitsü ta lemteta lir. Anungji oboula semchir telongjem lemtet mangartem pa mesüra la koba yimtsüng, town aser lokti balala nung lidir liaka oboula semchir-i (Ungma Imlang Jamijang) memetet aser kecha khuret mesüra tepela nung kin-i shilem magitsü. Pa aser la dak jakzük kecha lokti aser yimden nung kin tenüng nungi shilem agitsü memelar aser shibai shilem agidir pa/la khuret asütsü ta Ungma Imlang Jamir Mongsanger semchir lemtetba sangdonger.

Kin tenüng nung: -

1. T. Onentiba Jamir Tatar
2. Rarentemjen Jamir Tatar
3. Takoyanger Jamir Tatar
4. Takanukshi Jamir Tatar
5. Nugsangmeren Jamir Tatar
6. Temsünungsang Jamir Tatar

Katalin Kariko aser Drew Weissman nati Nobel Prize in medicine angu



Stockholm, Mongputeni/Oct. 02 (Agencies): Hungary nung asor Katalin Kariko aser US nungi Drew Weissman nati COVID-19 den raratsü mRNA vaccines mezüngbuba Pfizer aser Moderna ajanga yanglutetsüsa bushiba atema 2023 Nobel Prize in Physiology mesüra Medicine angu.

"Tanü-asüng tendak meimchir health tsütsü timtem tulutiba mapang sempet angur ana yagi vaccine yangluba nung shilem tulu agi," ta Sweden yimtiba Stockholm nung tetendanger temi Hombarnü ashi.

Katalin Kariko ya Hungary nung aliba Sagan's University

nung professor lir aser University of Pennsylvania nung adjunct professor lir. Drew Weissman-i iba sempet angutsüsa research ya Kariko den lungjemer University of Pennsylvania nung agia liasü.

Tenati diploma ka, gold medal ka aser sen million \$1 jenjang cheque ka December 10 nü Stockholm nung sentong ka agidang King Carl XVI Gustaf ket nungi agizüksü, koba 1896 küm scientist Alfred Nobel asüba anogo lir, shibai pa rongsen nungi iba senpet ya tenzükdakja liasü.

Taküm medicine nung iba sempet angutsüsa jenjang tongteter rongnung America

nunger biologist Kevan Shokat liasü, shibai lung, colon cancer aser pancreatic tumours adokdaksüba KRAS cancer gene nokdangtsü bushiteta liasü.

American biologists Stanislas Leibler aser Michael Elowitz natia synthetic biology asoshi synthetic gene circuits bushitetba mechi iba sempet angutsüsa toktepa liasü.

Iba ya ajanga scientists temi organisms yanglushia tashi tasen ka yangluteter.

Taoba küm Nobel Prize in physiology mesüra medicine sempet ya Swedish scientist Svante Paabo-i ngua liasü, shibai meimchir poktetba jangjatsüsa Neanderthal DNA bushiteta liasü, koba ajanga meimchir immune system tali tajungba angatetdaksür.

Nobel Prize in physics ya Mongulbarnü sangdongtsü, chemistry indang Bodhbarnü sangdongtsü aser literature indang Brehostibarnü sangdongtsü. Nobel Peace Prize ya Hokulbarnü sangdongtsü aser economics award ya October 9 nung sangdongtsü.

EU foreign minister tem senden amentsü Ukraine nung adenshia lir

Kyiv, Mongputeni/Oct. 02 (Agencies): European Union nung züngsem linük ajak (27) nungi foreign minister senden amentsü asoshi Ukraine nung adenshia lir, koba par bloc arütsü alema oa senden amenba tang mezüngbuba alitsü aser ibaji ajanga Kyiv yariba sayur.

Ukraine ya tarutsü nung EU nung adentsü asoshi inyaktepba mapang jelia osang mesangdongi iba senden ya amener. Russia-i tashi ajak amshia Ukraine amak tenzüker ita 20 buba nung lir.

"Ni tanü EU Foreign Minister tem senden Kyiv nung jateper, koba EU alema orr Member States 27 prong senden mezüngbuba alitsü," ta EU indang foreign policy chief Josep Borrell-i social media sapang X nung Hombarnü ashi.

"Ukraine tarutsü tia EU nung lir," ta pai ashi.

Rara tenzüka sülen EU züngsem linüktem nungi ketdangsürtemi mapang shia Kyiv semdanga liasü, saka Ukraine yimtiba nung EU ketdangsürtemi sendenbo tang

mezüngbuba alitsü.

Ukrainian Foreign Minister Dmytro Kuleba-ia iba senden asoshi tenüngsang agüja X sapang nung lemsatepa liasü.

"Ukraine nung EU foreign minister tem otsütsütsü sendeni adeni arurtem pelashishia agizüker. Puti otsü nung tang mezüngbuba EU arütsü alema orr senden amener. Saka tarutsü arütsü telung nung lir."

Iba senden ya bloc-i Ukraine yaritsü temolungtetba Moscow dang sayutsü asoshi amener, ta French Foreign Minister Catherine Colonna-i ashi.

"Takok mangu tashi onoki Ukraine yaritsü molungtetba sayutsü asoshi lir. Tarutsü nunga onok alitsü," ta lai Kyiv nung osangbener dang ashi.

EU züngsem linüktem den United Kingdom aser United States-i Russia den raratsü asoshi Ukraine nem mitkar tsütsü aser senotsü teyari kanga sashia agüja liasü.

Ukraine nem teyari tasen agütsütsü aliba US Congress-i nokdangba sülen Hombarnü iba senden ya amener.

NSF Trophy: United FC aser F4C na quarters-i iogo



Kohima, Mongputeni/October 2 (TYO): Hombarnü NSF asayamung nung United Football Club Piphema aser Football For Change (F4C) nati pei tata asaya koka quarter final tongtetogo. Iba asayamung ya Angami Students' Union (ASU)-i ayongzuka Indira Gandhi Stadium, Kohima nung tang asayadar.

Mezüngbuba asaya ya United FC Piphema aser Azufii Football Academy na kanga toktepa asayaba sülen Piphema-i goal 2-1 agi koka liasü.

Asaya nung United FC atema mezüngbuba goal Razoukhrieli-i (13) minute 12buba nung idaktsü, saka Shanti Y Konyak-i (10) minute 20buba nung Azufii atema goal ka idakja goal kasasa aküm. Iba

stülen ano minute 37buba nung Ayen Manga-i (7) United FC atema atema tanabuba goal idakja liasü.

Asaya tanabuba shilem nung telok anapronglai goal idaktsütsü asoshi meranga asaya, ajisiüaka goal magütsüti United FC-i asaya akok. Iba asaya atema ASU Executive aser taoba mapang Chakhroma Youth Organisation tir Seyieneilhou Keyho-i United FC nungi asayar Joyson Rhi (3) nem man of the match naroküm agüja liasü.

Hombarnü tanabuba asaya nung F4C Academy-i goal 2-1 agi Jakhama Youth Organisation (JYO) madak takok ngua liasü.

JYO atema Ntselo-i (6) minute 37buba nung mezüngbuba goal idaktsü

asaya mezügbuba shilem tembanga liasü.

Ajisiüaka asaya tanabuba shilem nung F4C Academy atema Kamgouhao Dounge-i (11) goal ka idakja goal kasasa aküm. Telok ana tsünga kanga toktepa asayaba sülen F4C academy atema Seigongin Chongloi-i (6) minute 75buba nung tanabuba goal idakja parnoki asaya akok.

Iba asaya atema F4C academy nungi asayar Khaiminlen Touthang (1) nem man of the match naroküm agütsü. Iba naroküm ya taoba ASU Executive aser 23buba NSF Martyr's Memorial Trophy Co-convenor Khriezeli Vitso-i agüja liasü.

October 3 nü asaya: Red Scars FC VS Viswemi FC.

Ronaldinho-i October ita tom nung Kolkata semdangtsü



Mongputeni/October 2, 2023 (Agencies): Brazil nung nungtuugu football asayar Ronaldinho-i sangdong ka ajanga, pai Kolkata yimti Durga Puja benjung mamung tsünga semdangtsü ta shiogo.

Ballon d'Or asembe tashi ngur aliba asayar yagi tang mezüngbuba football asaya kanga meimba yimti ya semdangtsü. Kolkata ya taoba mapang nungtuugu football asayar Pele, Diego Maradona aser Lionel Messi nungeria

semdangogo. "Ni taküm October ita tom nung Kolkata semdangtsü," ta arishi küm 43 tain taoba mapang asayar yagi pa indang official Facebook page nung post sütsü.

"Kolkata nung Brazil nung fan tem aika lir ta ni meteta lir aser ni parnok den ajuruteptsü yongya atar," ta paisa ashi.

Kolkata semdangba mapang Ronaldinho-i West Bengal Chief Minister Mamata Banerjee semdangtsü aser la

nem jersey ka sempet agütsütsü.

Maneni pai ashiba agi, pai Sourav Ganguly dang nungi cricket asaya angazüktsü.

"Ni cricket asaya ya kanga nungtuugu ta meteta lir aser tang ni iba yimti semdangba mapang Bengal indang 'Dada' dang nungi cricket asaya angazüker," ta pai ashi.

"Ni sponsor tem den sensakasemba den felicitation sentong aika nung shilem agitsü aser iba tebor tajung asaya ya ajungkettsü. Taküm Durga Puja mapang Samba Magic tenzükdakjang... Ami tomader bhlo bhashi (ni nenok ajak meimer)," ta pai shisem.

Brazil nung asayar ya October 16 nü yimti atongtsü imlar aser pa yimti nung anogo ana mungzükba sülen Dhaka-i aotsü, ta ketdangtsü kati PTI dang ashi.

Charity football match ka asayaba den 2002 küm World Cup koker aliba asayar yagi football academy ka nung trainees tem den sensak asemtsü aser yimti nung Durga Puja pandal tem lapoktsütsü.

Asian Games: India nung asayartemi TT, Speed

Skating aser 3000m Steeplechase nung medal angu

Mongputeni/October 2, 2023 (Agencies): Asian Games nung Hombarnü India tsür Ayhika Mukherjee aser Sutirtha Mukherjee nati otsüsütsüsa tetsür Table Tennis asaya nung bronze medal nguogo.

Bronze medal atema tena North Korea team den asaya, koba tatembangbuba game tashi kanga toktepa asaya liasü, ajisiüaka N Korea tsür Sugyong Pak aser Suyog Cha nati 7-11 11-8 7-11 11-8 11-9 5-11 11-2 agi Ayhika aser Sutirtha na koka liasü. Team ana tsünga minute 60 asaya liasü.

Hombarnüsa India nung roller skater temi tetsür aser tebur 3000m team relay events nung bronze medal nguogo.

Tetsür team nung Sanjana Bathula, Karthika Jagadeeswaran, Heeral Sadhu aser Aarathy Kasturi Raj nungeri alizüng 4:34.861s nung tongteta asayamung tenzükker anogo tekububa nung India atema mezüngbuba medal ngua liasü.

India tsürtem ya gold medallists Chinese Taipei (4:19.447) aser South Korea (4:21.146) na sülen tasembuba nung iba asaya tembanga liasü.

Iba sülen tebur team relay nung Aryanpal Singh Ghuman, Anandkumar Velkumar, Siddhant Kamble aser Vikram Ingale nungeria bronze medal ngua liasü. Parnoki 4:10.128 nung alizüng tongteta liasü.

Iba asaya nung Chinese Taipei-i (4:05.692) gold aser South Korea-i (4:05.702) silver medal ngua liasü.

China Open: Medvedev semifinals-i iogo; Swiatek-ia takok angu

Mongputeni/October 2, 2023 (Agencies): Daniil Medvedev-i Hombarnü China Open nung France nung asayar Ugo Humbert 6-4, 3-6, 6-1 agi koka semifinal-i iogo.

Mezüngbuba set ana nungbo Medvedev-i junga masayatet ajisiüaka tasembuba set nungbo pai kanga junga asaya Humbert madak takok aser aser taküm semifinal 10buba tongtetogo.

Russia nung asayar ya semifinal nung Alexander Zverev mesüra Nicolas Jarry den asayatsü.

Second-ranked, aser top-seeded asayar Carlos Alcaraza quarterfinal nung seventh-seeded asayar Casper Ruud den asayatsü lir.

Kasa mapang nung China Open nung tang mezüngbuba asayaba mapang tetsür

India nung roller skater temi Guangzhou 2010 Asian Games nunga men's free skating aser pairs skating event nung bronze medal ana ngua liasü.

Maneni tetsür 3000m steeplechase nung India tsür Parul Chaudhary-i silver medal angu aser Priti-i bronze medal nguogo.

Asaya nung Parul-i Asian Games record ajateta liasü saka la indang national record and personal best (9:15.31) majateti liasü, koba lai Budapest nung World Championships asayaba mapang ajangzüketa liasü. Budapest nung kanga junga asayaba sülen la Paris Olympics atema qualify süogo.

Kasa asaya nung Priti, Parul sülen second 16 agi temenoba asaya tembanga liasü. Lai 9:43.32 nung alizüng tongteta bronze medal angu.

Kasa mapang nung tebur 200m asaya nung India nung asayar Amlan Borgohain trokbuba nung tembanga liasü.

Iba asaya nung Japan nung asayar Koki Ueyama-i gold medal, Saudi Arabia nung asayar Mohammed Abdullah Abkar-i silver aser Chinese Taipei nung asayar Yang Chun-Han-i bronze medal ngua liasü.

India tsürtem rongnungisa Ancy Sojan-i tetsür long jump asaya nung silver medal ka nguogo. Iba asaya ya China tsür Xiong Shiqi-i (6.73m) akok aser Hong Kong tsür Yue Nga Yan-i (6.50m) bronze medal ngua liasü.

BILEMDANGANG

"Timla dang lira ajak takoktsü."